

**Sud Bosne i Hercegovine**
Суд Босне и Херцеговине

Broj; S1 3 IŽ 039621 21 IŽ
Sarajevo; 26.01.2021.godine

Sud Bosne i Hercegovine, u drugostepenom vijeću sastavljenom od sudija Srete Crnjaka kao predsjednika vijeća, Vesne Trifunović i Dinke Bešlagić Čovrk kao članova vijeća, odlučujući o žalbi političkog subjekta Narodni pokret "Banja Luka zove" koju zastupa Saša Lazić, izjavljene na odluku Centralne izborne komisije Bosne i Hercegovine broj: 05-1-07-1-96/21 od 21.01.2021. godine, o poništavanju izbora održanih 15.11.2020.godine na 89 redovnih biračkih mjesta u izbornoj jedinici Doboj, na nejavnoj sjednici održanoj dana 26.01.2021. godine donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, poništeni su izbori održani 15.11.2020. godine na taksativno navedenih 89 redovnih biračkih mjesta u izbornoj jedinici Doboj za nivo gradonačelnika Grada Doboja i Skupštinu Grada Doboja, te je odlučeno da će se nakon pravosnažnosti odluke, donijeti odluka o raspisivanju ponovnih izbora.

Ovu odluku pobija politički subjekt Narodni pokret "Banja Luka zove" u kojoj navodi da je bilo neophodno poništiti izbore održane 15.11.2020. godine na svim biračkim mjestima u izbornoj jedinici Doboj. Kako to nije urađeno onemogućeno je ponovno formiranje izbornih lista da bi se izbjeglo ponovno učešće fiktivnih političkih subjekata u radu biračkih odbora. Ožalbena odluka donesena je nakon utvrđenih brojnih nepravilnosti, dokazane izborne krađe, enormnog broja glasova SNSD-a i njihovih kandidata, pa je u odluci bilo nužno utvrditi odgovornost nalogodavaca za povredu izbornih prava, odgovornost izborne administracije i posmatrača, te iskazati namjeru o izvršavanju svoje dužnosti podnošenja krivične prijave. Činjenica da lokalni izbori nisu poništeni na 17 redovnih biračkih mjesta sa većinskim bošjačkim življem, a poništeni su na 89 redovnih biračkih mjesta sa većinskim srpskim življem, ostavlja mogućnost manipulacije. Na biračkim mjestima na kojima izbori nisu poništeni poznati su rezultati i prestavnici tih političkih partija i njihovi posmatrači

mogu imati motive koji neće težiti objektivno provedenim ponovljenim Lokalnim izborima. Nadalje, glasovi iz inostranstva za ovu izbornu jedinicu nisu potvrđeni i time je onemogućeno podnošenje zahtjeva za ponovno brojanje ovih glasova. Zbog svih ukazanih povreda, propusta i zloupotreba smatraju da se trebaju poništiti izbori na svim biračkim mjestima ponovo formirati izborne liste, ponovo izvrši prijavljivanje kandidata i političkih subjekata, te smjeniti Gradsku izbornu komisiju Doboj i kazniti sve učesnike i nalogodavce izborne krađe. Prijedlažu da se ožalbena odluka ukine ili poništi, naloži Centralnoj izbornoj komisiji BiH da poništi izbore na svim biračkim mjestima u izbornoj jedinici Doboj, utvrdi postojanje elementa krivičnog djela u vezi sa povredama izbornih pravila i izrekne mjere zabrane vršenja funkcije u izbornoj administraciji svim učesnicima u izbornom procesu.

Centralna izborna komisija Bosne i Hercegovine dostavila je ovom sudu odgovor na žalbu u kojem predložila da se žalba odbije kao neosnovana jer ožalbena odluka sadrži jasno navedene nepravilnosti utvrđene na biračkim mjestima na kojima su poništeni izbori. Rezultati na biračkim mjestima na kojima nisu poništeni izbori biće utvrđeni zajedno sa rezultatima ponovljenih izbora na koji način će se dodjela mandata izvršiti na osnovu rezultata za cijelu izbornu jedinicu. Ponovljeni izbori provode se na osnovu istih kandidatskih listi i istih izvoda iz Centralnog biračkog spiska prema odredbi člana 14.1. Izbornog zakona, pa je neosnovan žalbeni navod o potrebi ponovnog prijavljivanja kandidata i formiranja lista. Ukazuje da su pokrenuli postupak utvrđivanja zakonitosti rada izborne administracije u osnovnoj izbornoj jedinici Doboj, te će se zavisno od rezultata postupka utvrđivati pojedinačna odgovornost za povredu izbornog zakona, a ukoliko se steknu saznanja o radnjama koje imaju obilježje krivičnog djela dostaviće se dokazi nadležnom tužilaštvu.

Žalba nije osnovana.

Prema shvatanju apelacionog vijeća, pobijana odluka Centralne izborne komisije BiH broj: 05-1-07-1-96/21 od 21.01.2021.godine o poništenju izbora održanih 15.11.2020. godine na 89 redovnih biračkih mjesta u izbornoj jedinici Doboj za nivo gradonačelnika Grada Doboja i Skupštinu Grada Doboja, je pravilna i zakonita.

Iz predmeta spisa proizilazi da su odlukom o raspisivanju i održavanju Lokalnih izbora 2020. godine između ostalog raspisani neposredni izbori za Skupštinu Grada Doboja i gradonačelnika Grada Doboja, te da je na dan održavanja Lokalnih izbora 15.11.2020. godine, Centralna izborna komisija BiH zaprimila pozive i informacije, prigovore i žalbe političkih subjekata, birača i akreditovanih posmatrača o neregularnostima izbornog procesa na biračkim mjestima u osnovnoj izbornoj jedinici Doboj. Ukazivanje na neregularnosti u istoj izbornoj jedinici Centralna izborna komisija BiH zaprimila je 17. i 18.11.2020. godine, te je cijeneći sve informacije pokrenula postupak po službenoj dužnosti, zbog osnovane sumnje da su povrijeđena pravila izbornog procesa i izbornih prava na biračkim mjestima u osnovnoj izbornoj jedinici Doboj.

Nakon uvida u skenirane Zapisnike o radu biračkih odbora sa 106 redovnih biračkih mjesta, izjašnjenje Gradske izborne komisije Doboj, uvida u skenirani izvod iz Centralnog biračkog spiska, angažovanja vještaka grafologa i uvida u izvještaj posmatrača okupljenih u okviru Koalicije „Pod lupom“ o posmatranju izbora u Doboju,

Centralna izborna komisija BiH donijela je ožalbenu odluku o poništenju izbora na 89 redovnih biračkih mjesta u izbornoj jedinici Doboj za navedene nivoe.

Obrazloženje odluke CiK-a BiH broj: 05-1-07-1-96/21 od 21.01.2021. godine sadrži argumentovane razloge za poništenje izbora na taksativno navedenih 89 redovnih biračkih mjesta navođenjem na kojim biračkim mjestima je došlo do nepravilnosti, u čemu se nepravilnosti ogledaju i na osnovu čega su utvrđene. Sva utvrđenja navedena u osporavanom rješenju proizilaze iz stanja spisa, pa ovo vijeće nalazi kao pravilnim i konačni zaključak da utvrđene nepravilnosti na 89 redovnih biračkih mjesta u izbornoj jedinici Doboj nesumnjivo utiču na izborni rezultat. Time su ostvareni zakonski uslovi za primjenu odredbe člana 2.10 Izbornog zakona BiH (Sl. glasnik BiH br. 23/01 sa izmjenama) na kojoj se ožalbena odluka i zasnova.

Žalba političkog subjekta Narodni pokret "Banja Luka zove", ne osporava pravilnost utvrđenja razloga za donošenje predmetne odluke CiK-a kako u pogledu utvrđenih činjenica na kojima je zasnovana, tako i u pogledu primjene materijalnog prava. Nepravilnost ožalbene odluke žalilac vidi u činjenici što nisu poništeni izbori i na preostalim 17 redovnih biračkih mjesta u osnovnoj izbornoj jedinici Doboj, smatrajući da se izborni proces treba ponovo provesti kroz ponovnu prijavu kandidata i formiranja izbornih lista .

Prije svega odredbe člana 2.10 Izbornog zakona daju ovlaštenje CiK-u BiH da poništi izbore u izbornoj jedinici ili na nekom biračkom mjestu ako prilikom glasanja ili brojanja glasačkih listića dođe do nepravilnosti koje utiču na rezultate izbora. Iz obrazloženja ožalbenog rješenja jasno proizilazi da nisu utvrđene nepravilnosti na svim biračkim mjestima, pa nisu ispunjeni zakonski uslovi da se ponište izbori za cijelu izbornu jedinicu Doboj.

Nadalje, neosnovan je i žalbeni navod da je u konkretnom slučaju potrebno provesti ponovnu prijavu kandidata i formiranja izbornih lista, jer je protivan odredbi člana 14.1 Izbornog zakona koja propisuje da se ponovni izbori provode na osnovu istih kandidatskih lista i istih izvoda iz Centralnog biračkog spiska koji su korišteni na poništenim izborima.

Ni preostali žalbeni navodi nemaju uticaja na zakonitost i pravilnost predmetne odluke. Naime, u slučaju da u ponovljenim izborima dođe do neobjektivnosti na koju žalba ukazuje žalitelju će pripadati pravo zaštite izbornog prava, pa mogućnost nastupanja takvog stanja nije osnov za poništenje predmetne odluke. Predmetnom odlukom žalitelj nije onemogućen u podnošenju zahtjeva za ponovno brojanje glasova iz inostranstva. Nakon potvrđivanja i objavljivanja rezultata za izbornu jedinicu Doboj koji će se sastojati od rezultata iz ponovljenog glasanja, te rezultata sa glasačkih mjesta na kojima izbori nisu poništeni i rezultata utvrđenih putem mobilnog tima, glasanja nepotvrđenim glasačkim listićima i glasanja putem pošte i iz inostranstva, žalitelju će pripadati pravo podnošenja prigovora za ponovno brojanje glasačkih listića dobivenih na svaki od nabrojanih načina glasanja. Osnov za poništenje odluke nije ni činjenica da ožalbena odluka ne sadrži navode o odgovornosti izborne administracije za povredu Izbornog zakona ili utvrđenje sumnje o počinjenju krivičnog djela, jer se radi o dva različita postupka koja se vode nezavisno i nisu međusobno uslovljeni, pa ožalbena odluka ne mora sadržavati

izjašenjenja o provedenim postupcima utvrđivanja odgovornosti kako žalba neosnovano ukazuje.

Iz navedenih razloga, apelaciono vijeće nalazi da je pobijana odluka Centralne izborne komisije Bosne i Hercegovine pravilna i zakonita, a žalba neosnovana, pa je istu primjenom odredbe člana 81 stav 1 Zakona o upravnim sporovima BiH (Službeni glasnik BiH br. 19/02 sa izmjenama) valjalo odbiti.

**PREDSJEDNIK VIJEĆA
S U D I J A**

Sreto Crnjak